

بِسْمِ اللَّهِ الرَّحْمَنِ الرَّحِيمِ

KHUTBA JUMMAH

HAZRAT MUHYI-UD-DIN AL-KHALIFATULLAH

Munir Ahmad Azim

06 Novembre 2015 ~
(23 Muharram 1437 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite contigne quatrième partie de so Khutba lors « *Khidmat-e-Khalq* »:

Alhamdulillah Summa Alhamdulillah, mo pé continuer le Khutba lors « *Khidmat-é-Khalq* ». Donc, dans ene Hadith rapporté par Hazrat Abu Hurairah (ra), Hazrat Muhammad (saw) fine dire ki : **Celui ki ena *Imaan* (la foi) lors Allah et dans le Jour du Jugement**, c'est-à-dire, celui ki ene vrai croyant :

- (1) Faudé pas li cause la peine (ou faire di tort) à so voisin.
- (2) Faudé li entretenir so *Mehmaan* (invité) avec générosité,
- (3) Faudé li cause bane bon causer (*c'est-à-dire li cause bane causer de Néki, et non pas bane mauvais parole ki capave blesse so prochain ou sois bane paroles inutile*), sinon li reste tranquille. **(Bukhari)**

Li fine donne sa trois conseils là en référence avec Allah et le Jour du Jugement Dernier. Li pas fine cause aucaine causer ki trouve entre sa bane zaffaires là. Li pas fine mentionne amène *Imaan* lors livres, lors prophètes, lors *Arkan-é-Islam* (bane fondations et croyances de l'islam) etc. Li fine quitte tous sa bane zaffaires là, li fine mentionne le commencement (c'est-à-dire, croire en Allah) et la fin (c'est-à-dire, le Jour Dernier).

En vérité kan li mentionne Allah, bé li pé pointe vers le commencement. C'est Allah même ki donne tous bane faveurs spirituelle et mondaines. Et c'est de Allah même ki ene dimoune gagne tous saki li bizin. Que ce sois, so lizié, so néné, so la santé, enfin tous céki li ena, même so bane provisions et toute sortes de choses ki li gagner dans la vie de tous les jours. Même bane zaffaires ki li même li pas trouver et li pas penser même, de ki coté li pé gagne sa bane zaffaires

là. Donc, le Saint Prophète Hazrat Muhammad (saw) dire, kan ou amène *Imaan* lors Allah, kan ou ena la certitude ki c'est Allah (swt) même ki faire ou gagne tous sa là et ou ena ene *Imaan* ferme lors le Jour du Jugement Dernier, entre sa deux là, ena ene lien profond et Allah et So Rassool (saw) fine mette sa comme ene avertissement. Si après tous céki Allah fine donner, ene dimoune retourne couma la poussière, c'est-à-dire, ene dimoune mort sans aucune conception du Jour du Jugement Dernier, bé ki différence li faire si pas li fine faire bon traitement ou non.

Kan ou faire ene *Ehsaan* (faveur) lors ene dimoune, finalement jamais li pou bizin présente devant ou, bé li pas pou prend conte même ki bane *Ehsaan* ou fine faire lors li. C'est pourquoi Hazrat Muhammad (saw) fine mentionne le sujet de *Aakhérat* ensam-ensam. C'est-à-dire si ena dimoune mazine Allah So bane faveurs et en même temps li mazine ki ena ene Jour du Jugement, bé à ce moment là, jamais li pou néglige bane faveurs ki Allah fine faire lors li. Parcequ'i li conner ki li ena ene conte pou rendu devant Celui ki fine donne li tous sa là.

Donc c'est ene vérité de céki Hazrat Muhammad (saw) pé mentionner là, kot nous pou bizin ranne compte, goûte par goûte de bane faveurs ki Allah fine faire lors nous. Et sa compte là Allah pas prend li dans sa façon couma nous l'esprit faible pensé lors là. Ou sois Allah pou guette ki ou fine donne Li en retour, NON. Mais Li pou guetter ki, ki ou fine donne So bane banda. De céki ou fine gagner, ki bane bénéfiques bane croyants et même bane non-croyants fine tirer de sa !

Alors bane tel vrai croyants, kan zot maziné ena pou rendre compte lors tous z'affaires, bé bane tel croyants pas pou donne la peine à zot voisins. Bé Jamaat Ahmadiyya kot fine arriver ki sa kantité la peine li pé donne bane membres du Jamaat Ul Sahih Al Islam acoze zot fine accepter la manifestation divine, fine croire dans ene dimoune ki proclame li pé gagne révélation de coté d'Allah et li vine de la part d'Allah, pou faire revivre bane l'enseignement ki ti exister et fine piétiné par bane soi-disant *Moullahs* ? Et zot donne mot-d'ordre pou pas faire *Salaam*, boycotte totale, coupe relation familiale et zot pé diriger par ene Khalifa à la tête ki zot pé prétendre ki c'est zot ki pou amène le monde vers l'Islam. Avec sa qualité mentalité là, zot faire tous pou block le travail du Jamaat Ul Sahih Al Islam, pé faire bane membres du Jamaat Ul Sahih Al Islam peur pou quitte la Manifestation Divine. Est-ce-ki zot pé maziné ki personne pas pou sappé avec rendre compte avec Allah de tous saki zot fine faire. Si ou pé prend ou ki ou ene Jamaat supérieur ou donne visa pou paradis, ou même sa Ambassadeur là ki garantie paradis pou tous bane Ahmadis, alors ou ti bizin reflécté céki ou metté lors ou bane masjids, bane bages « *Love For All Hatred For None* » juste pou montrer lizié créatures.

Pense bien, ou pé embête ou-même et bane dimounes ki fine amène ene *Imaan* aveugle lors saki astère zot pé représenter – zot népli pé représente vrai valeur de l'Islam et de Hazrat Massih Maoud (as). Mais pensé bien, jamais ou pou capave embête le Créateur. Zot conte ki pou render, c'est pas devant créature mais c'est bien devant Allah, le Créateur. La honte sa ! Si ena pou causer lors là et si ena pou mette zot vrai visage lors website pou ki le monde capave

trouver ki qualité *zouloum* zot fine faire avec nous bane membres du Jamaat UI Sahih Al Islam National et international, alors li bien chagrinant et la honte ça ki zot dire ki zot pé représente vrai valeurs Hazrat Massih Maoud (as). Zot ti bizin change zot motto et mette “*Hatred for All, Love for None*”. Au lieu de l’amour zot manifester la haine envers saki Allah fine fer dessane pou zot propre réforme interne et externe. Zot ena la haine pou Jamaat UI Sahih Al Islam ki fine vini comme le vrai Jamaat de Hazrat Massih Maoud, parski mazine bien, Jamaat UI Sahih Al Islam li pas en dehors cadre de bane l’enseignements de l’Islam et du Messie Promis du siècle passé. Au contraire, li fine vine pou renforcé fondations de Jamaat Ahmadiyya ki ti ena la mission pou amène le monde vers l’Islam. Mais Allah fine tini So promesse, et Jamaat Ahmadiyya en forme de Jamaat UI Sahih Al Islam pou bel et bien par l’aide puissante d’Allah amène sa révolution spirituelle là.

Bane Ahmadiis azordi jours, surtout bane ki à la tête et pé essaye façonne Jamaat Ahmadiyya dans zot l’image de corruption et de anti-Islam, alors zot bane excellent qualités morales ki zot ti ena avant (dans l’époque de Hazrat Massih Maoud (as) et en plein progression spirituelle) fine astère là tourne en la haine, l’arrogance, vantard, family-feeling, faire bane ti famille peur, mette frayeur dans zot lécoeur, tolère bane magouillère etc, etc.

Ensuite le Saint Prophète (saw) dire celui ki ena *Imaan* lors Allah et le Jour du Jugement Dernier, bé zot bizin honore zot *Mehmaan* (invités). Sa aussi c’est ene zaffaire extraordinaire. Ou, ou capave penser ki sa zaffaire honore *Mehmaan* là li ene zaffaire automatique. Bé alors kifaire Hazrat Muhammad (saw) ti bizin donne autant de bane conseils lors là aussi ? Ou capave penser ki bane ki content faire *Mehmaan Nawazi* (l’hospitalité), zot recevoir *Mehmaan* et bane ki pas content faire *Mehmaan Nawazi*, zot pas pou fer li et ou capave même pensé ki li dans la nature de l’homme pou fer le *Mehmaan Nawazi*, et alors ou capave pensé ki sa li ene zaffaire simple, commun, ordinaire. Mais le *Mehmaan Nawazi* ki Hazrat Muhammad (saw) pé appelle nous pou fer, c’est pas ene *Mehmaan Nawazi* ordinaire. Sa aussi ena connexion avec verset Quran là :

« Et zot ti donne à manger, pour l’amour d’Allah, à banes pauvres, banes orphelins et banes prisonniers, (en disant) : ‘Nous donne ou manger, pour simplement trouve figure d’Allah. Nous pas cherche de ou aucaine récompense ni aucaine remerciement.’ » (Al-Insaan 76: 9-10)

Alors pour la cause d’Allah, et malgré ki dans la caze même ena bane difficultés, mais là aussi ou honore, ou bien ou recevoir bane *Mehmaan*, bane pauvres aussi, bane orphelins et bane prisonniers aussi. Quran fine ouvert tout sa bane sujet là. Ce ki veut dire ki c’est pas zis si ene grand dimoune ou ene dimoune égale à ou, vine kot ou, ki ou recevoir zot bien. C’est pas sa ki verset Quran là pé dire. Verset là fine commencer are bane pauvres, bane orphelins, et bane prisonniers. Alors pou arrive à sa grand stage kot ou cherche l’amour d’Allah et pou gagne li, ou pou bizin commence par bane pauvres avant, bane ki dans le besoin, et ou pas fer li comme ene show, non, mais bien pour l’amour d’Allah.

En ce ki concerne bane prisonniers, zot pas pou capave vine kot ou, mais ou, ou capave alle kot bane prisonniers. Si ou alle visite bane prisonniers, ou amène impé manger et ene deux ti cadeaux. Et ou capave dire zot pou mange saki ou fine amener pou zot, kot peut-être zot pas gagne sa bane kalité manger là kot zot été (c'est-à-dire, dans prisons), et ou fer sa seulement pour la cause d'Allah.

Sa faire moi, maziné ki, kan nous ti faire nous Jalsa Salana à Rodrigues (avant mo alle endehors du Nizam-e-Jamaat), mo ti demande permission avec le commissaire, garde prison pou visite bane prisonniers et nous ti amène *briani* pou zot et bane gâteaux (pou prisonniers et staff aussi) et le même jour ti faire sa même traitement là dans bane l'hôpital à travers l'île kot sa ti faire ene grand l'impact kot media ti parle de sa boucou, sans ki nous ti ouler faire aucaine publicité avec sa ; nous ti faire sa seulement pou la cause d'Allah. Sa c'est *Mehmaan Nawazi* ki tombe sous sa verset là. Kot ou considère bane dimounes comme ou bane *Mehmaan* et kot ou ena le devoir pou occupe zot bien. Ensuite si ou soigne ene orphelin, ou guette li bien, parceki li privé de l'amour de so bane parents, et ki li bien difficile pou li pou surmonte sa cap difficile dans so la vie là, alors si ou occupe li (ou plusieurs bane orphelins) et content zot couma bane vrais parents content zot, et ou soigne zot bien, ou guette zot bien, alors sa c'est ene excellent morale ki ou bizin développer dans ou et ou réflécté sa dans ou bane actions envers sa bane orphelins.

Sa ti pou fer moi grand plaisir, parceki mo ena sa désire là depuis longtemps si le Gouvernement de Maurice donne moi sa permission là, *Insha-Allah* mo envie occupe tous bane orphelins de Maurice et de bane les autres pays du monde kot zot pé passe boucou misère et si Allah (swt) donne moi le *Tawfeeq*, moi et mo Jamaat International aide bane pauvres aussi, même héberge zot, donne zot zot nécessité et amène zot tous dans la spiritualité, kot *Insha Allah*, sa bane pauvres là pou vine riche dans *Aakhérat*.

Donc bane *Mehmaan* ordinaires, simples et pauvres ki fine vine kot ou, sa c'est ene teste pou ou pou tester ou bane excellent manières et ou bane excellent morales. Si nek ou guette ene pauvre comme bas et nek ou dire « *Eh guette untel fine vini, donne li so di pain, laisse li aller* » dans ene ton désagréable, couma dire sa pauvre là fine vine ene fardeau pou ou, bé sa mauvais manière là, pou vine ene péché. A ce moment là, bane zaffaire ki ou pé donne li etc, pas pou écrire comme ou *Mehmaan Nawazi*, mais pou écrire comme ene péché pou ou.

Donc le *Mehmaan Nawazi* ki Hazrat Muhammad (saw) pé mentionner li tellement excellent ki li péna connexion entre relation de *Insaan* (humain) et ene lotte *Insaan*, Non. Mais li en référence entre ene *Insaan* et Allah So bane *Banda* (serviteurs – bane vrais serviteurs d'Allah). Kot Allah ena So bane relation, si là-bas ou établi ou relation, c'est à ce moment là ki sa verset là appliquer lors ou. Donc réfléchi lors bane conseils de Hazrat Muhammad (saw), façon ki li fine reforme la moralité et conduite de bane dimounes ; sa bane excellent morales là. Depuis ki le

monde fine crée, tout bane prophètes ki fine vini dans l'univers entier pas fine donne autant de conseils pou reforme conduite de zot peuple autant ki Hazrat Muhammad (saw) fine faire tout seul pou so *Ummat (Communauté)*, ene *Ummat* Universelle.

Donc, nous sa Jamaat là (Jamaat Ul Sahih Al Islam) à travers la Manifestation Divine ki fine regagne sa bane bénéfiques de bane conseil de Hazrat Muhammad (saw). Donc l'organisation du Jamaat Ul Sahih Al Islam bizin vine active dans *Tarbiyyat* de tout le Jamaat en entier. Et bane dimounes ki tane sa la voix là, ou bizin redresse ou morales en résultat de l'amour d'Allah et de So prophète (saw) kot ou redresse ou morales, morales ou madames, sœur, ou bane enfants et aussi porte attention à ou bane voisins.

Donc mo pé bizin arrête là même pou azordi à cause faute de temps et sa c'est en effet ene sujet bien vaste kot pas pé capave arrête li là même. Ena bane membres bizin alle prend travail. *Insha Allah* vendredi prochain, mo pou continué so 5^{ème} partie. Ki Allah (swt) donne moi sa Tawfeeq là. *Ameen*.